

ديوان جسور العشق

بقلم

ميخائيل رياض



بطاقة فهرسة

حقوق الطبع محفوظة

مكتبة جزيرة الورد
اسم الكتاب : رواية جسور العشق
المؤلف : ميخائيل رياض
رقم الإيداع :
الترقيم الدولي:



الطبعة الأولى 2016

تقديم لديوان (جسور العشق)

بقلم د. يسرى العزب

ميخائيل رياض.. شاعر عامية جديد.. يجتهد لكي يصل بنصوصه إلى النضج والاكتمال.. تتطور أدواته بسرعة.. يستجيب لما يحس فيه من الصدق حول ما يكتب.

يتردد علينا في ندوة دار الأدباء.. كل أربعا.. لا ينقطع تردده إلا قليلا.. وفور عودته إلى ندوته المفضلة يقدم اعتذارا لا نطلبه.

تدور معظم نصوصه حول الذات.. ذاته هو.. الطامحة إلى الرقى، يبدو مواطنا مصرية راغبا في تغيير الواقع إلى الأفضل.. يكلم نفسه بضمير المتكلم غالبا.. والمخاطب أحيانا.. يشارك بشعره -الأقرب إلى الزجل- في مناسبات الوطن.. يسعى للتوحد مع بنى وطنه مزيلا كل العقبات في طريقه للتوحد.. حتى إنى أراه هلالا يعانق الصليب.. أو صليبا يلوذ بحضن الهلال.. وهكذا عاشت مصر وتعيش كنانة الله في الأرض.. أبنائها خير أجناد الأرض.. ميزان العدل في الجهات الأربع.. رمانة الميزان في التاريخ..

تحية لأخى في مصر وفي الشعر.. ميخائيل رياض.. وأملا في استمراره شاعرا جادا.. يقدم لنا المزيد من عطايه.

د. يسرى العزب

الجيزة في 21/10/2016

إهداء

إلى كل القلوب التي تعرف الحب

إلى كل القلوب النابضة بالوفاء والإخلاص لمصر الحبيبة .

أهديكم كلماتي التي تعبر عن وجداننا عندما نشعر بالحنين تجاه من نحب .

إلى كل أصدقائي الشعراء الأوفياء الذين قدموا لي النصيحة وتعلمت على يدهم الكثير .

أهديكم أرق المشاعر وأغلى الأمنيات بالسعادة وطول العمر .

إهداء إلى القارئ العزيز .

متمنياً لكم قراءة ممتعة وأرجو أن أكون عبرت ولو بجزء بسيط عما يجول بوجداننا في

الفرح والحزن والضيق وساعات الألم .

إلى أبنائي الأعزاء ...

مايكل وماريا وزوجتي العزيزة

لكم جميعاً متمنياً من الله أن يديم عليكم الفرحة ولمصرنا الحبيبة .

وسط الطيور

وسط الطيور في السما
طائر أنا علشان أعرف حبنا
وكل طير بيقول لطير
إزاي الحب ضمنا
حتى القمر نادى النجوم
علشان تنور جنبنا
وهوا النسيم شق الغيوم
علشان يفرح قلبنا
مشتاق أنا أفضل هنا
وأنا وإنت طائرين في السما
وانت هناك وأنا معاك
عاشين في جنة حبنا
ننسى الحياة في وسط ناس

ونعيش سوا أجمل إحساس
اتنين أحبة طيرين فى غربة
وكمآن قلوبهم م الحب شاربة
وكل الطيور عارفين بإنك
إنت الحبيب وعلينا شاهدة
وها طير معاك من هنا لهنالك
فى قلبى شايلى مية ألف وردة



وحياة العيش

وحياة العيش والملح

لسه باقى على عشرتك

وحياة قلبى الى حبك

وداق حنيتك

لتفكر ألف مرة

قبل ما تاخذ خطوتك

وتنسى العشرة الى بيننا

وما أشوفش غير قسوتك

فكر فى أيام زمان

راح فىن بس الحنان

فىن الود الى كان

فىن راحت بسمتك

كنت القلب الحنين

لما كنت تشوف دموعى

كنت ف حضنك تاخذنى

وتستنى رجوعى

نستنى ليه الأمانى

ورتنى غدر زمانى

وبعتت الحيرة تانى

فى قلبى وف كيانى

كانت العشرة جميلة

وكأنها ألف ليلة

ليه تنهيهها بكلمة

وتسيب آهاتى فيها

فكر ليه قلتها

وشوف إنت حلها

وإرجع لى ولحضنى

إرجع لعشرتك



في غمضة عين

في غمضة عين

تلاقيني أجي لك

يا حبيب العين

في غمضة عين

ما هو إنت

عيونى الإثنين

بس إنت شاور

هتلاقى

قلبي ليك طائر

دايب وساير

في رمش

عينيك الحلوين

يا الى ملكت القلب
وعشانك عرف الحب
مجروح لكن بيحب
والأشواق ليك والحنين
خليني جنبك خليني
ونسيني القسوة نسيني
وأفرح معاك بكل سنيني
ولا غيرك هيهنيني
وأشوف رؤياك
يحس قلبي هواك
واخذني هناك
يوريني أحلى السنين

ما إئت بقيت

لقلبي بيت

وأنا فيه حبيت

حبيب العين



ما تعيش شارد

يا حبيبي ليه شارد بعيد

وناسي ليه حبنا

واخترت ليه طريق البعاد

خليك قريب منا

محتاج للمسة حنان

محتاج لود يضمنا

وباشوف وجودك في الوجود

مع إنه ساكن قلبنا

مشتاق كتير أعرف أنا

إيه الي غير طبعنا

ومين الي قال إن الفراق

بيجرى ف دمنا

فيه ناس بعد الفراق

عاشوا قصة حبنا

حتى الورود بتعيش حزينه

ساعة ما تحس بحزننا

فكر شوية ليه الأسى

وتعالى نشرب الحنية

ده كل طير ليه مكان

يحب يشرب منه الميه

حتى النجوم ليها ليل

تيجى تسكن وتفيد حواليه

ما تعيش شارد خليك مهاود

وكفاية إنك

حياتي اللى جاية



أجمل وشوش

أنا إفريقي الوشوش

أنا قلبي يا ناس بشوش

أنا أحب اللون الاسمر

الى من غير رتوش

أنا نهر النيل سلطاني

في الحب يا ناس خلاني

بين أهلي وبين خلاني

في الحق يا ناس مالوش

أنا م القارة الحلوة

في القلب ليها مية غنوة

أم الضحكة البيضاء

والحزن ما تعرفوش

أنا لوني لون الطيبة

والضحكة يا ناس قريبة

أنا قارتي عجيبة

بأجمل الوشوش



مد إيديك

مد إيديك

وطلعيني من همومي

مد إيديك

وشاركيني يومي

ما إنت ساكنة

جوه قلبي وف حنيني

إزاي أعيش

من غيرك إنت

عمري وسنيني

في كل لحظة تبقى معاي

بالقى فرحي

بانسي حزني

بانسى دمعى

بانسى جرحى

وأبتدى وياك حبيبى

أنا كل سعدى

يا اللى حبك

قرب لى وعدى

ضاعت سنينى منى

حبيبى قبل منك

ورجعت لى يا كل مالى

يوم ما عرفتك

شفت الحياة من غير رجاء

حتى أعيشها

وظهرت فيها خليتي أحس

إنى عاشقها

أرجوك حبيبي ما تسيبش

لحظة الا نعيشها

نفرح حبيبي بحبنا

وننسى همومنا



طالب ودي

بتناديني بالدموع

وتقول سامحني

بتناديني

وانت اللى جارحني

غدرك ليّ

سهم ودبحني

قال وناسي

قلبك ليه مخاصمني

قال وجاي تقيد شموع

والعيون فيها الدموع

جاي وناوي لي الرجوع

لأ لا سامحني

كنت ليك كل الحنان

كنت ليك كل الأمان

غدرت ليه وسبت المكان

وجرحت قلبي

وجاي تقدم إعتذار

بتقول لي الزمن غدار

قال وطالب الإنتظار

وطالب ودي

شفت راحت فين السنين؟

مشيت ومعها الأنين

وانت قال م المظلومين

والظلم مني



على القنال

جم شبابنا وجمعوا

همة رجال

قلنا غالبيين باتحادنا

نتحدى كل المحال

جمعوا كل القلوب

لأجل خلافتنا تدوب

نبقى واحد

وننسى ده قلنا وقال

كلنا عند القنال

بالمحبة والعمل

إيد تساعد

وإيد تقدم الأمل

بالمحبة نقيد شموع

وما فيش أبدا رجوع

يا الله نبني

يا الله نترك الكسل

ع القنال كلنا رايعين

ويا جيشنا فرحانين

جيشنا واحد لشعب واحد

بالحب متحدين

لينا قائد هو رائد

واحنابيه متوجين

ع القنال بنعل راية

ع الشمال وعلى اليمين

جمعوا همم الشباب

قلنا بطلنا العتاب

يا الله نبني

يا الله نترك الكسل



مصر

مصر يا نسمة صبية

أحلى غنوة ف مغربية

ويا صحبة ولمة حلوة

ويا ضحكة رايحة جاية

مصر يا أم المعانى

والله فيك حلاوة ربانى

أحلى غنوة فى الأغانى

والحنان لأ لأ شوية

فاتحة للدنيا ذراعك

لى قاسى ولى باعك

كلهم يا امه ولادك

ما تشيلش ليهم قسية

إحنا حالفين لك نصونك

مين يا بلدى اللى يخونك

قومى بصى دول جنودك

حاملين معاكِ المسئولية

يا أم نيل زين خدودك

راسم لك كحلة عيونك

والحياة يا أمه بدونك

ما تساويش يا أمه يا غالية



جيش بلادی

أقوى الجيوش إنت يا جيشنا

يا نور وسند طريقنا

يا جيشنا رفعت راسنا

ورفعت راية بلادنا

في الليل أو في النهار

حاميين حمى الديار

في برد أو في نار

رافعين راية انتصار

قائد لشعب عظيم

أمين بقلب حكيم

ملهم ثورة تعليم

رجع أحلام بلدنا

مهما تكون الظروف

جيشنا ما يجي له خوف

قائد قلبه عطوف

وبالحب ليه جمعنا

الإيد في الإيد هنبني

وعشان النور لبلدي

أنا يا اولادي أضحى

وتعيش تعيش بلدنا



عدى زمن السكات

عدى زمن السكات

لازم أقول وأبوح

دى مصر هى الحبيبة

والعطر منها يفوح

ودى رسالة وطن

لازم نداوى الجروح

عايزين نلم شملنا

واللى فى قلبه حاجة يبوح

خلى بالك يا شعب

حلينا لغز الصعب

والقوة جاية تحاربكم

بس بحوار اللعب

وده جيل ثالث

وده جيل رابع

بيشنعوا بالكذب

على اسم مصر حبيبتى

ما خلاص فهمنا اللعب

شيلوا ايديكم من جيوبكم

وسلموا على بعض

خلوا الحضن يديكم

وكفاية كره وبغض

ده خالق الكون واحد

كفايانا كره وعند

بقيتو ليه زى السمك

لما بياكل بعض

واخذ في وشك وماشى

والزمن غدار

وليه بتئذى الخلايق

وليه تشعلها نار

ولصالح مين يا اخوى

دى لعبة الشطار

إنك تحب وطنك

ما تهدش فى العمار

مش مهم إسمك محمد

والا كمان مينا

عايزين بكف واحد

نحرر أراضينا

ونشيل يد الإرهاب

من وسط سينا

حتى إن سالت دمانا

الحب يروينا



مصر بتنده لنا

مصر بتنده لنا ودموعها في عينيها
بتقول عايزة الولاد يتلموا حوالها
وكفاية كده تفريق بنص ليه عليها
جواها جرح وألم والحب مراسيها
إبدروا بذور المحبة سوا فوق أراضيها
نحصد حنان وألفة وقلوب تدفيها
وكل واحد في عمله يخلص ويعطيها
نبني فيها المصانع ونصلح أراضيها
وكل زارع لأرضه بالخضرة يملئها
نجنى منها الثمر واوولادنا تراعيها
إتلموا بقى حوالها وإيدينا في إيديها
نشوف أحلى ما فيها ونلف سواقها
وتروى أرض المحبة والكل يسقيها

وننسى سوا الخصام والى حصل فيها

ونبدأ صفحة جديدة بأيدينا نحليها

ونرسم سوا السعادة والضحكة سابقانا

بصوا على الخراب فى بلاد محاوطانا

واتعلموا منها الدروس بيقولوا آه يا انا

أطلال عليها غراب وفى الفخ شبكوها

ووقعوا فيها بغاوة والأهل باعوها

عايزين للدرس نفهم وبلاش تعاندوها

إفهموا إيه الحوار دى الخطه رسموها

إبتدوا بالعراق وخلاص خربوها

ودمروا جيشها القوى ومنه خطفوها

وآه عليك يا سوريا والى حصل فيك

بيخططوا من زمن يخلصوا عليك

وشردوا اولادك من وسط أراضيك
وآدى حالك يا ليبيا والإرهاب حواليك
وشوفوا حال اليمن والكره ماليها
وسبقوا بالسودان وقسموا أراضيه
فوقوا يا شعب مصر بالحب إملوها
وشبكوا الأيادى عشان تدفوها
عارفين أحلى ما فيها الرب حاميها
وبارك شعبها ورسم خطاويها
عيشوا بالمحبة برموشكم غطوها
وحبوا بقى بعضكم وبقلوبكم ساندوها



أنا طالع للقمر

أنا طالع للقمر

ذيعوا ياناس الخبر

وإذا كان هناك خطر

نتعود على السفر

بالاقى هناك حنان

والقلب هناك دفيان

والى لهواه عطشان

ييجى يشوف القمر

هناك المغرمين

وكل العاشقين

وبتحلو السنين

مع طلوع القمر

بيجمع لى الورود

وبيفرح لما اعود

وهناك وحيبي موجود

باسهر في ليلة سمر

هواه ساكن في قلبي

ما أقدرش يا ناس أخبي

عايزه على طول في قربي

ونعيش رحلة سفر



خوفى عليك

خوفى عليك يخلينى

أنسى وجود الناس

ولا شايف غير نبض قلبى

ودفؤه والإحساس

وأجرى عليكِ

وعينى تيجى ف عينيكِ

ولما تسلم وإيدى

تكون فى إيديكِ

بالقى روحى

جوه روحك

ولا حاسة بالناس

حواليك

ما أنت ليّ أعز الناس

ما أنت ليّ أغلى الناس

كل نبض الحب أنا حساه

وباشوفه في عينيك

كل جرح القلب

ما يطيب إلا بيبك

وبانسى دمع العين

ويفرح قلبي بيبك

حتى ف وقت ضعفى

همس الحب ليك

ما إنت ليّ أعز الناس

ما أنت ليّ أغلى الناس

لما باكون في حيرة

ألقى صوتك معاً

هو يحكى وقلبي يسمع

ويقول الحكاية

وكل حاجة فيه

بتردد معاً

وكل دقة ف قلبي

تقول يا أجمل حكاية



بتحبني

بتحبني بتقول باحب

إزاي وليه؟!

بتحبني عايز تقول

ع الحب إيه؟!

أنا كنت بارسم الأمل

وف كل ليلة

كنت تضيع حلمنا

وتجيب لي حيلة

تحكي بخداع

يا ابو قلب باع

حب السنين

من غير وداع
كنت باعش لك
كل لحظة بالدموع
كان لي قلب جواي
وخارج من الضلوع
لكن باقول لك إيه؟!
كفاية اللى احنا فيه
إنسى الحاجات والذكريات
للى يعيش لياليه
ولا عمره سمع ع الهوا
واللى اتكوى قبله
خليه يدوب مع السنين
والأيام تطويه



مصر الجميلة

يا سمرا ضميني

في العين وحطيني

وإن تهت يا حبيبتى

ع الشط رسيني

يا سمرا من غيرك

يسقيني من خيرك

يا حبيبتى من قلبي

يا مصر بادعي لك

مهما أكون رجال

ويقسي على الحال

يا حبيبتى بارجع لك

وتغيري الأحوال

بالحب نسيني
من الجرح عالجينى
يا حبيبتى من حبك
على طول بتسقينى
لما الزمن يندار
وبقيت أنا محتار
ده أنا يوم ما بالقائك
تبرد فى قلبى النار



أنا باكره الدموع

قلبي مالهوش رجوع

ليه جاي بالدموع

علشان تعيد موضوع

موضوعك مش مسموع

نسيت كل الأحزان

نسيت حتى المكان

والماضي صار دخان

طاير مالهوش رجوع

قلبي ما بقاش يحبك

ولا فاكر نبض قلبك

ده نسي كمان ملامحك

ونسى ضى الشموع

نسى حتى الغرام

ده كله كان أو هام

قال جايّ بالسلام

وفي عينيك الدموع

خليك إنت لغرامك

خليك وعيش أحلامك

خليك قاعد مكانك

خلي لك الدموع



عودى

كعيون الشمس الذهبية

حسيت بلقائك

أصل إنت المرسى يا حبيبة

وبارتاح وياك

وسلمتك قلبى يا حبيبتى

يدوب فى هواك

أصل إنت القمر وأنا نجم

عالق فى سماك

أرجوكِ عودى لأحضانى

أنا فى انتظارك

متلهف قلبى يا حبيبتى

يسكن فى ديارك

أنا عمري ما ابيعك يا حبيتي

إنت ف شرياني

والقلب ف حبك عطشان

إرويه بحنانك

بعد المسافات حبيتي

لا يمنع قلبي

بل زاد في سرعة نبضاته

وزاد الحب

مشتاق متلهف للقاءك

ونسيت ظلمك وقساك

دى النظرة فيك تسعدنى

وباحس كياني



أنساك إزاي

أنساك إزاي وإنت القلب

اللى باعيش بيه

وعشانك قلبى حب ونسى الماضى

وكمال لياليه

ونسيت القسوة وشايف بكرة

وباحلم بيه

يا أجمل حلم هاعيش علشانه

وأفكر فيه

حببت الحب بكل حلاوته

وكل آهاته

مع إنى باعيش بالدمع

لكن يا حبيبى عايش لذاته

وعشانك حتى النسمة
بتشوف بكرة فارد جناحاته
يا محلى كل الكون فى عينى!!
وشايف إبتساماته
كل أيامى وأحلامى
بقوا ملك إيديك
أنا طول العمر معاك يا حبيبى
وبا فكر فيك
يا كل سنينى القلب أمرنى
ما اعيش غير ليك
حتى ليلالى يا كل مالى
باسهر أنا جيڪ



في ذكرى 6 أكتوبر

كانت ساعة البداية

يوم ما قررنا العبور

كل ليل وله نهاية

بعزيمة الجندي الجسور

بعد تار كان قايد

في القلب نار

وانتهت ساعة الهزيمة

ورجعنا كل انتصار

كان قوتنا ف وحدتنا

قلنا نرفع بيها رايتنا

ع الضفة الثانية من سينا

وما حدث يكسر عزيمتنا

وحررنا بايدينا اراضينا
والفرحة غمرت ديتنا
واخوتنا العرب ساندونا
والحب جمع وحدتنا
وقفنا صف واحد
كلنا قمنا نجاهد
منعنا كل خير عن عدو
دايما معاند
والبترو ل منعوه عن عمد
قالوا لاجل العدو يتهد
وكمان سوريا ورجالها
خطوا ايديهم في ايدينا بجد
شوفوا الحلم ده كله منين

ويا عزيمة جندي متين

ويا قائد نادى وقال:

مصر دى نور العين

شد عزيمة الضباط

الكل وقف بثبات

ولا فيه واحد قال يا بلدى

ما ارجع إلا ما أثبت الذات

شوفتو شعب زى الشعب المصرى

شوفتو جندي زى الجندي المصرى

دول خير أجناد الأرض

دول هم شعاع النور

الى يهدوا الظلم ويبنوا السور

دول شقوا القنال

علشان قررروا العبور
ويحرروا على طول الأرض
بالقوة من غير ما نقول
واللى ما يعرف جنودنا
يبقى هو المسئول
ولابد من درس تاريخنا
ويحكم كل العقول
عن جيشنا وعن حضارتنا
وعن شعب يفعل ما يقول



الببل

الببل نادى على الكروان

قال له من حاتم أنا زعلان

قاموا نادوا بحب على الإنسان

وقالوا له ليه حاتم كسلان

العلم يفيد وسلاح فى الإيد

بيه نتستفيد وكمان بنفيد

العلم يطور كل جديد

ونعلى بايد ونبنى بايد

العلم سلاحك يا إنسان

وتعمر بيه فى كل مكان

وبلدك هيكون لها عنوان

وعلمك هينور بلدان

أم الحنية مصر

حببتي في الحنية
مالهاش أبدا وصف
على طول تسأل على
ما هي دي هي مصر
في الشدة بتلاقيها
شايلاك جوه عينيها
وإن غبت كثير عليها
لازم ترجع تنجيها
دي هي دي الحبيبة
الى من القلب قريبة
وإن طالت بينا الغيبة
ما القاش غيرها حبيبة

على طول ساكنة ف قلوبنا

عشاق وفيها دوبنا

دى فيها كمان محبوبنا

الى مدوب قلوبنا

وفيها الذكريات

تحكى عنها روايات

وياما قالوا عنها

وتشهد الحضارات



كل الحياة

كل الحياة أنا عشتها

بحلوها وبمرها

فيه ناس تعيشها بالبكاء

وناس تعيشها بضحكها

ما لقتش واحد فيها

يقدر يتحدى القدر

والى يعيش فيها وحيد

والى يعيش رحلة سفر

وشفت أنواع من البشر

تجرى تسيبك فى الخطر

وناس تحاوطك بالحنان

علشان تساعدك فى القدر

عيش الحياة بدمعها وفرحها

خليك كواحد منها

حب الحياة بشمسها

وغطى الحبيب بضلها

مهما تكون عايش وحيد

خليك قريب من أهلها

واسقى ناسك من الحنان

تعيش سعيد في حضنها



الذكريات

كل الى فات من عمرنا

كان ذكريات

حتى الى جرح قلبنا

بقى ذكريات

حتى الدموع على خدنا

حتى الحنان والود الى ضمنا

نسيت خلاص كل الى فات

كان شكله إيه

نسيت سنين من عمرنا

عشناها ليه

حتى الأماكن مش فاكر كان لونها إيه

وجاى ليه تعيد حاجات؟ ما هو كله مات

و جای تصحی صوت السکات

دی سنین و راحت مننا

وفاکر ساعات

تجیب الی فات

ما طویت خلاص کل الی فات

فی الذکریات



أطهر شباب

إيد الغدر والإرهاب قتلوا الشباب

زهر مصر وجعلوا في كل بيت عذاب

وف كل قلب مصرى جرح من فقد الأحباب

ما تسيبش يا بلدى حقهم وجا يوم الحساب

كل القلوب اتجرحت عشان جنودنا

ودمع العين غرق خدودنا

يارب صبرنا وبرد قلوبنا

واهدى الى غدروا بدمهم وزيل الضباب

كتر العداوة ما تسيبش غير الخراب

ودول بشر؟ والا حجر؟ وإيه الأسباب؟

كارهين بلادهم ويستبيحوا دم اولادهم

جنودنا في الجنة وف وسطهم أطهر شباب

يا اللى ما تعرف أنت مين؟ وجاى ليه؟
والغدر طبعك ولا ليك وطن تعيش عليه
راح ييجى يوم وتحس فيه
إن الخيانة وبيع الوطن مجرد سراب
كل الأمل وكل الحنان فى شعبنا
ولا فيه جمال ولا فيه وطن غير عندنا
فكر شوية وخليك واحد مننا
وإنسى القسوة وهنسى ليك حتى العتاب



في وقت ضعفى

في وقت ضعفى

باحس إنى فى دنيا تانية بعيد

باحس إنك واقف جنبى

ومدفينى أكيد

باحس إيدك بتكون علىَّ

وكأنى لسه وليد

ده حب والا ده شوق ولهفة

باحسه لسه جديد

فى سكوتى باشعر إنك بترسم

صورة قدام عينىَّ

تحكى لى وأسمع وأرد وإنْتَ

تقول قرب علىّ

في وسط ليلى تكون لي شمعة

بتنور لياليّ

إحساسى بىك وحبى ليك

يمكن عليك شوية

مرات باسافر وف وقت سفرى

باحس إنى معاك

واقف بانتظر وكأنى باحلم

وتقول أنا وياك

صوتك فى ودنى بلبل يغرد

ويصحينى شجاك

بأحلى الكلام وأجمل غرام

وتقول لى: باستناك



ياست يا مصرية

ياست يا مصرية

يا حلوة يا فدائية

يا شايلة فوق كتافك

كل المسئولية

لما مصر تناديك

تيجي ببسمة عينيك

وتفديها بحياتك

ده الحب كله ليك

كنت ف وسط الميدان

ولا أجدع الشجعان

واللى يكون تعبان

بتسنديه بإيديك

يا سلام يا سلام عليكِ

تعيش وتدوم خطاويكِ

يا ساندانا ف حياتنا

دى الدنيا تحلى ببيكِ



الدنيا

أنا عايز الدنيا تفرح
والخوف ما نعرفوش
واللى فى القلب يجرح
تعالى ما نعملوش
قم يا الله إفرح وهيص
والفرح معاه نعيش
واللى مش عايز فرحة
يبعد ما يقربليش
يا اللى تحب الجمال
أهو الجمال موجود
والحب والدلال
ما لهمش طريق مسدود

إجعل يومك جديد

بالحب والمواعيد

والقلب إن كانش سعيد

إحنا ما نكلموش

الدنيا مش مستاهلة

نحزن ولا حتى يوم

والحب بيه هنتقى

وكفايانا بقى هموم

واسأل أهل التجارب

واسأل أغلى الصحاب

واللى جرب وحب

ارتاح من العذاب

قرب وخذ حببيك

وقابله بالأحضان

واعرف إنه نصيبك

قبل فوات الأوان



نهضتك يا مصر

نهضتك يا مصر جاية

بالعزيمة المية مية

بايدين شباب أبية

والعناية الربانية

قومي وابني المصانع

ده شبابك ورد طالع

يا الله خضري المزارع

أفراحك لسه جاية

حطى نورك ع السفينة

لما ترسى جوة مينا

في السويس أو في المدينة

بور سعيد أو إسماعيلية

يا الله زيني شبابك

الى واقفين على بابك

يا ما أحلى وأجمل خطابك

بالسواعد العفوية

بصى لحدودك تلاقى

جيش بلادى بالتلاقى

سهران يحرس خطاك

بالسلاح والمدفعية



ضميني يا بلدي

ضميني هتلاقيني

راسم ضحكة ف عيوني

تناديك سنين عمري

وأعيش ليك

يا فاهماني يا عارفاني

يا عايشة جوة وجداني

بابص عليك من بدرى

ألاقي الحيرة واخداني

بشمسك حتى أو ضلك

بكل الى إشتهى حسنك

بنورك أو سواد ليلك

بحزنك حتى أو فرحك

عاشق ليك باناديك
عشان أبقى قريب منك
واحس بكل حنية
واحس بحنان قلبك
ألاقي الذكرى في الماضي
أحس إنى أنا راضى
وبحنانك تسامحينى
وتيجى علىّ وتنادى
وناسية إنى أنا جرحك
وناسية حتى عنادى
تملى تضمينى فى حضنك
وأحس بحضن أجدادى
حببتى شوفى ده نورك

يا شايفانى بحلا عيونك
ده سحر الكون فى شجونك
وورد الصبح فى حدودك
أنا عايش باشوف رسمك
وباوصف يا دفا شمسك
وأحس حنينى فى حضنك
أهرب م الحر فى ضلك



رديت روى

أنا كنت فين

لما جيت قدام عينى

كنت تايه وف لحظة

ردت روى فى

إنت النسيم والهوا

والدنيا دى

ما اقدرش أغيب عنك

يا الى نستنى القسية

بامشى ف شوارع المدينة

ألقي صورتك

عايز أحكى لى أقابله

وأقول حكايتك

عايز أشاركك كل شئ

حتى هوايتك

قرب كمان قرب لحضنى وامسك إيدى

فيك الحنان

فيك كل حاجة عن زمان

فيك الدفا فيك المشاعر والأمان

قلبي سعادته

لما تكون إنت فرحان

بالقى سعادته معاك

والحياة تبقى هنية



الريس نادانا

الريس نادانا

للفرح دعانا

حوالين قنالنا

نوح خطانا

وحدنا الصفوف

ملايين وألوف

وجيشنا مصفوف

يتمم هنانا

علقنا الكهارب

جهزنا القوارب

أصبح لنا نايب

والعرب معانا
جمعنا الأيادي
للعمل يا بلادي
يا فرحة ولادي
والريس ويانا
الوحدة جمعتنا
ومسحنا دمعتنا
بالريس عرفتنا
بالحكمة نجانا
ما نقشنا أسامينا
ع القنال وسينا
والفرح مخلصنا
بنسابق خطانا



المقدر والمكتوب

مقدر ومكتوب

إننا نعشق وندوب

ولا حدش يوم يتصور

إمتى يكون المكتوب

قصة وبتمر علينا

والقلب يقول حيننا

ولما ييجى يتحرر

ما يكونش خلاص بايدينا

الحب بيجى ف لحظة

بحلاوته أو بمرارته

والقلب ما يوم يقرر

أو حتى ينقى الصحبة

ده نصيب وجا لحدك

يلخبط فيك ويعاندك
وإن قلت سييني وحدي
تلاقيه ساكن قلبك
أصله مقدر ومكتوب
حتى لو كان ليه عيوب
ورضيت أو ما رضيتش
على قلبك بقى محبوب
إمشى وخلاص مشوارك
قلل عذابه ونارك
إوعى تستغنى عنه
وإوعى تخرجه من دارك



يا حنين

يا حنين يا خالق الكون

يا أبو الجمال كله

ده اللى بينده لك

خيرك بيوصل له

تسمع تملى النداء

من كل قلب حزين

وتلبى طلباته

دوغرى قوام فى الحين

عادل ورب معين

خالق ووصيتنا

ع الفقرا والمساكين

أمى

أمى يا أجمل دفا وحنان

كنت ف بطنك أنا فرحان

لا خوف ولا حرمان

كنت باحس الدنيا أمان

أول ما أضحك كنت معاى

راسمة البسمة راسمة هنأى

كنت الحصن وكنت سماى

يا أجمل نعمة من الرحمن

كان الحصن ملان حنية

وإيدك الدافية حاضنة إيدى

حافضة ملامحى شوية شوية

وقبل ما أنام بتبصى علىَّ
ولما كبرت بقيتِ صديقتي
شائلة همومي فاكهة ليَّ ضيقتي
عمرك يوم أبدا ما كرهت
قلبك صافي ونور بيان



الأم مدرسة

الأم مدرسة منها بتتعلم

مهما تكون أستاذ لكلامها هتسلم

شفنا كثير إعجاز وقلوبنا تتكلم

يوم عيدها يوم الرضا الأم دى البلسم

مين فيكو يوم مولده ما بكاش قدامها

ف حضنها الدافى م الحب راس مالها

ترضع وتشرب حنان والقلب يدعى لها

أجمل عطايا الله ومعها ما تتألم

وتعدى بيك أيام وتمر بسنينك

شايلة معاك همك وفى الفرح تدعى لك

ولو لحظة قلت الآه دموعها سابقينك

حافضة كل ملامحك وإيديها شايلينك

إياك تعيش لحظة إلا برضاها

دى الجنة تحت أقدامها والدنيا عارفها

الأم دى مدرسة والعلم دنياها

عيش لاجل ترضيها وتلبى دعواها



الحجر الداير

قالوا كتير عن حجر وداير

يمشى يلف دواير

راح ييجى يوم ويكون مكسور

والا يلف ويفضل حاير

فاكر نفسك تقدر تخدع

بكرة خداعك يوم هيبان

واللى إنت بتخفيه فى السر

بكرة هيظهر يا إنسان

بس ها يظهر وإنت مطاطى

وكسوفك ع الوش يبان

أصل خداعك عمره ما كان

هيخليك أبدا إنسان

عايزة تقولى إيه

رغم إن الفرصة
لسه ما جاتش لكن
حبي ليك مالى لى
كل الأماكن
رغم كل بعادك لى
وألقى منك كل قسيه
برضه قلبى يحن ليك
وحبك ساكن
عدى العمر معاك بيجرى
والحنيه ما جاتش ف بالك
والا ف لحظه ندهت وقلت
إبنى حبيبي وآجى فى خيالك

ليه يا حبيبتى قادرة تخونى

وليه ما اكونش فارس لحصانك

أنا يا حبيبتى باغزل توبك

بلونه الأخضر

ناقش فيه الورد الأحمر

بريحة العنبر

وليه مش عايزة تمدى إيدك

وتقبلى منى الحب الصافى وقلبي يعبر

ليه يا حبيبتى حبك جامع للغرباء

ليه بتسيى النبع الصافى وكله صفاء

ليه بتبصى لجيل مش جيلك

واللى ينور هنا قناديلك

ليه مستاء

عايزة تقولى إيه من فضلك

والا ملامحك خايقة تقول لك

إن أنا جاي لك أطلب ودك

بص تلاقى ملايين حولك

عايزة تقيسى الحب بجد

حنى وضمى وشيلي السد

ليه هتسيبي واحد حبك

شارد ضايح حيله تهد



ما نسيّتش أنا

ما نسيّتش انا كل اللى فات

من عمرنا

حتى الألم وضحكنا

ويوم فرحنا

ولا يوم نويت

أهدم عشنا

كنت معاك بارسم

حياة هتضمنا

بتقولى إيه عن الحب

وعن المشاعر

بتقولى باعشق والكلام

أنا شايفه طائر

وعين تبص من بعيد

والقلب حائر

كنت السبب وكمان

جرحت قلبنا

الدنيا فيها ناس وناس

وكل ناس ليهم طباع

فيهم الأمين واللى عايش

على الخداع

وعشان كده أنا جيت

أقول لك الوداع

خلينى أعيش لحظة حنان

من حلمنا

عدت على سنين

وجرحنى الألم
لكن رضيت أعيش
بقلبي الى اتظلم
وشريط لماضى يحكى
ألقى الدنيا هم
كفاية كده الى ضاع
من وقتنا



كلمة سلام

كلمة سلام

تعني السلام بمعناها

كلمة تدق في القلب

والأحاسيس حاساها وعارفها

بتقول سلام

قاصد تقول إيه في السلام

قاصد سلام

ولا انت ناوى الانتقام

يا اللى ما تعرف

شكل أبراج الحمام

كلمة سلام

تبقى حب ودفء غامر

تبقى فرحة وطيبة

ورقة مشاعر

هى النماء هى الصفاء

والكل قادر

مش ناس تهدف كل حاجة

وبقلب غادر

كلمة سلام

أن يبقى الكل راضى

مش ناس بتظلم ناس

ومالكش قاضى

وناس بتخرج من أرضها

وتقول لى عادى

واللى يعيش من غير أمل

والحلم فاضى

كلمة سلام

تبقى كفة تساوى كفة

مش كفة طابة

وناحية ما فيهاش حتى كفة

وناس بتسلب حق ناس

وفارضة قوة

وناس تموت من الألم

ما شفتش فرحة

سيب المكان يا الى انت

مش إنسان

سيب المكان مادمت كاره للأمان

يا الى ما تعرف فين حدودك

وعايز تكون ليك الحياة

وكمان تكوش ع الحيطان



مصر الكريمة

إنتِ يا مصر الكريمة
وعشانك الأرواح تهون
في أى محنة تمر بينا
بتلاقى كل العيون
واقفة بتحرس خطاكِ
والصراخ يملأ السكون
إنتِ يا مصر الحضارة
وإنتِ الأعلى
في كل الكون
والصليب حاضن هلاله

يا اللى حُضنك أصله حنون

حبي ليك عمره أبداً

ما ينتهى أنا بيك مفتون

إنت الباقية يا أجمل وردة

وسط الكون عاشقك بجنون



بديناها بإيد مصرية

رجعت لينا بالسلامة

بعد ما صبرنا يا امه

بعد الغيبة الطويلة

وبأجمل ابتسامة

فرشنا سكتها نور

دى هيَّ بدر البدور

والكون صبح مسحور

وفرح بأغلى هدية

مالناش في الحزن تانى

وموانى عزفت أغانى

وشبابنا غنى تانى

فرحان بأحلى صبية

يا سنين خدينا قدام

نرسم سوا الأحلام

أول خطوة لقدام

بديناها بإيد مصرية



بالإيدين الشقيانين

بالإيدين الشقيانين

نبني أحلام السنين

ننسى بيهم الى فاتنا

والوجع ويّا الأنين

يا الله نعمر بلادنا

يا الله نسبق خطوتين

وخلي الحب يجمعنا

والود يا مصريين

العالم كله عارف

مصر بلد الرجال

فيها الوشوش حلوة

مشهورة بالجمال
وقلوب مليانة طيبة
وبتكسب بالحلال
وساعة الجد تلاقيهم
بالهمة شغالين
رغم كل الظروف
بيتحدوا الظروف
والبسمة في عيونهم
والحب والمعروف
ولما تيجى تقابلهم
ماتحسبش أى خوف
أحلى مافيهم الطيبة
وعرقهم ع الجبين



الحلم جای

الله عليك يا شعب

يا اللى اتحديت الصعب

وانتهى وقت العتاب

وبدأنا عملنا جد

رفرف علم بلادى

وكدنا به الأعداى

ضامم كل ولادى

بالحب ويا الود

الحلم جای جای

والليل نهايته الضى

يا بلدنا مالکیش زى

وشبابك زى الورد

لسه فاكر

كان لسه فاكر
إن أنا هاسأل عليه
كان لسه عارف
حبنا طب ليه ناسيه
أنا فاكرة حبه
وإزاي باهون عليه
كل ثانية كنت باحلم
أبقى جنبه وهو يعلم
إن حبي ظل أقوى
رغم كل أمور ماضيه
رغم ده كنت الحنان

والسكن ليه والأمان

مافهمش معنى حبنا

والاحترام والخوف عليه



غيرى ملامحك

مهما أشوفك يا حبيبتى

فى انكسار

مهما يقسوا ويكسروا

جدار العمار

مهما حتى يغيروا معالم طريقك

لازم ييجى يوم

وتطلع شمس النهار

جوه حلمى هافضل أمشى

مش هاكون أبدا لوحدى

جوانا الأمل الى طارح

وكلنا هنروح نعدى

أنا نفسى أخرج

من جوه حدودى

نفسى أعيش

أيام حدودى

والأمل يطلع له نور

وليه تحطى فى الطريق

مية ألف دور

وليه دبلانة زهورك

نفسى أجي يوم وأزورك

وأنت كلك نور بهية

والعبير مالى زهورك

والا مكتوب لى تملى

إن حلمى يكون أسير

والطريق مايشوفش حلمى

واحلم الحلم الكبير

والا مستكترة إنى

إنى أعيش زى الأمير

مهما كان الحلم طالع

جواى أفضل أثور

وكل ما أعبر لشطك

ألقى بحرك ليه بحور

خلى أيامى جميلة

كسرى كل الصخور

إمتى أشوف الشمس طالعة

إمتى أشوف العتمة نور

وليه مكتفة إيدى

والطريق مليان جحور

والليالى كل ليلة

ليها طعم غير الى قبله

وكل واحد فيك أقابله

ألتقيه غير الى قبله

والحياة ليها طعم تانى

والحنين مش نفس شكله

كل واحد فينا عايش

بس مش حاسس ملامحه

والصحاب مش حاسة بعض

فيه ما بيننا ألف بعد

الى جرى لك وانتِ

كنتِ بتشديننا شد

غيرى الأمل الى طائر
كنت بتجيبى البشاير
واللى تعبان من ولادك
احضنيه مايكونش حاير
كل قسوة لينا باينة
لازم الخير يلتقيها
يرميها بقوة برة
والسواقى تلف فيها
تروى فيها غصون محبة
للى سهران بيناديها
واللى يعرف إيه أصولها
يا سواد الى يعاديها
لما نحلم خلوا كل الحلم وردى

شيلوا من طريقها شوكتها

خلوني أعبر واعدى

أنا ابن من ولادها

ليه شايفنى ليه باعدى

جى ليها من حدودها

والحنان ليه حايشه عنى

ليه بنلقى قلوبها فاردة

والرياح على طول معاندة

زبط الدفا عشاننا

مش هتبقى ولادها شاردة

جمع الدنيا عشانها

زين شبابها ورجالها

خليها تفضل عروسة

والتيجان تزين جمالها



الظلم

الظلم جاى مننا

عمره ما كان من ربنا

الظلم ليه ناس أساتذة

بيحبوا ياكلوا حقنا

يعمل كأنه بيحملك

مع أنه أصلاً يهملك

ويلف حواليك الحيل

وعن الشهامة يكلمك

ليه ألف ومية إيد تسانده

وتخطط ليه وتحب تعامله

وييجى قدامك وكأنه

ساعى للخير وماfish زيه
أستاذ فى الكذب والأعيه
يعقد مية فكرة على إيده
يغزلها طاقة على مقاسك
يوعد ويخلف مواعيده
فى وقت هيتتهى زمانك
والكرسى هيفضل فى مكانك
ونهاية عمرك هتقدم
لله دفتر حساباتك
ما تفكر قبل ما تيجى تظلم
من حق الناس تغرف تسلب

وقصور في خيالك تبنيتها

خليك عادل ده الله أعلم

مين فينا هيسبق التانى

وساعتها تكون أنت الجانى

على نفسك ساعة ما ياخذها

راجع حساباتك من تانى

وحشاني يا نوبة

وحشاني يا نوبة

بسمارك الفتان

وياخذني الحنين

من غيرك أنا تعبنا

ونخيلك العالى

ينده لى: تعالى لى

يا بلاد المحبة

يا أرض الحنان

بتضم حكاوينا

صحبتنا أهالينا

بيتهم فى ريح بيتنا

وليهم محبتنا

أهل الكرم والجود

ييزيدوا فرحتنا

لنا لغوة نحكيها

بتضم وحدتنا

ونقشنا ع الحيطان

من أبهج الألوان

أفكار بقي لها زمان

عن كل ثقافتنا

في الفرح نتسامر

في الحزن نتقابل

مهما أغيب عنك

بإسمك أتفاخر

النيل حبايبه كثير

نمشى له بالمشاوير

صغير أو كبير

من أصل طيبتنا

يا نوبة ضميننا بالحضن وخذينا

وطيبي جراحنا

يا كل مالينا



إنت تقدر

كل شئ يكون سراب

لما بتحس بعذاب

بتلاقيها حتى مرة

لما تقفل كل باب

انتصارك يوم ما تبقى

في الطريق على طول صبور

بالإيمان دايما هتقوى

إنت ليك مية ألف دور

المواهب فيك بطبعك

نمى فيها وزيد في حسنك

واعدل الميزان وحاول

مية واحد يأخذ بيدك

لما تلقى كثير تجارب
خدها مركب خدها قارب
عدى بيها كل محنة
وأعرف أن الحب غالب
كل شدة هاتلاقيها
خدها طوبة وابنى بيها
ما تخليش ولا لحظة فيها
إلا جسر وفوت عليها
الحياة هي الأمل
وكل شئ هيحتمل
لما تنور طريقك
لما تسعى للعمل
هد جواك السراب

إوعى تفضل للعذاب

إفتح لحياتك أبواب

حتى لو تفتح سرداب

بص للنجوم وحاول

كلم القمر وشاور

يا الله إبدأ

يا الله قاتل

إوعى تيأس

أنت قادر



لما أفكر

لما أفكر

دنيتي معاك بتكبر

وتبقى أكبر حاجة ليّ

تبقى أجمل تبقى سكر

لما تفرح بيك عينيّ

والسعادة يا حبيبي تكون شوية

علشان حبك هو أحلى

حاجة فيّ

كل فكرة تبقى جنبك

أحلى فكرة

أنت ماضي أنت حاضر

أنت بكرة

والربيع ما يكون ربيع

إلا بوجودك

يا إلى حليت الحياة

لحظة رجوعك

دنيتي بامشيها وأنت

حببي طريقها

بانسى الجراح ومعاك بارتاح

وباكون عاشقها

ولهبب الحب يبقى بشكل تانى

كل حاجة فيه جميلة

ويتغير زمانى

حتى ليلي حتى سهري

يبقوا ليهم طعم تانى



بتقول ظروف

محتاج كتير أفهم أنا

إيه معنى كلمة حبنا

بتقول ظروف من كام سنة

ونعيدها ليه هي الظروف هتھمنا

يا أبو قلب كان لون الحليب

وكان يطيب ولا الطيب

عايز تفرق وتقول نصيب

وتسيب زهورك في الطريق

ما تخلي العشرة حبيبي

وياك تكون

ود وأمل وحياة

بأحلى لون

ما فيهاش خداع ولا لوع ولا دموع

عمر الحنين والود

ما كان ممنوع



التأمين الصحي

لما تلاقى كثير مساكين
واقفين تايهين
تعرف إنك في التأمين
وحرقة دم وشغل روتين
والعلاج ما لهش ضمان
ومواده مش في الحسبان
وعليه علامة إستفهام؟
يمكن علشان بالمجان
والأسوأ سوء المعاملة
ولا بسمه ولا كلمة حلوة
ولا تعب ان ارتاح شوية
دكتور بيقفل يومية

ولا رحمة في القلب عليك
ويقول لك مجروح أداويك
ويكون لك بلسم يشفيك
ده لو كلمة ها تأثر فيك



ماريا الجميلة

إهداء إلى إبتى

سألت كل الصبايا

مين فيكم الأحدى

قالوا الى طبعا ماريا

من اسمها بتحلى

ما أحدى رسمة عينيها

وحلاوتها فى الكحلة

دفت لى المشاعر

وفرحت فى الزحمة

كانت دنيا غريبة

وبعد خطاويها

جيت يا ماريا فيها

حليت معانيها
وتاهت منى الضلمة
بكل لياليها
وجا الفرح في القلب
يتأمل حكاويها
زهرة جميلة بتفتح
أمل بكرة
أروح لبعيد وأنسى
الماضي والذكرى
وشايف فيك الحاضر
بينده لى
وحتى الورد يفتح

ونسماته تقرب لى

وكل غالى فى الدنيا

ها جييهولك

وكل نبع حنية

لحلا عيونك

وكل الحب فى قلبى شايلهولك

دى ضحكة عمرى رجعت لى

بقدمك



مايكل

إهداء إلى إبنى

ليالى العمر باحسبها عشان خاطره

يكون قدامى وأتملى فى ملامحه

وأشوفه راجل والدنيا تحس شهامته

فيه الأصالة والحب يكون رايته

ده هو الخل والصاحب فى دنيانا

مراحل عمرى وباعيشها ماهو صبايا

باشوف الدنيا والمسها فى ضحكاية

ولما اتعب أنادى ألاقى نفسه ويأى

فراق الأخ فات لى دموع وأنين

فجانى مايكل عوضنى تعب السنين

يارب باصلى من قلبى تكون له معين

يكون ناجح فى طريقه ثابت وأمين

يا حلم عمري

من زمان وأنا عايز أقول لك

إنتِ مني وأنا منك

يا اللي شايلة عني همي

عايز أضمك

الحنين ينده تعالى

ما انت سر إنشغالي

إنتِ دايمًا على بالي

وقلبي حبك

إرمي راسك على صدري

وفوق كتافي يا حلم عمري

فضفضي وقولي اللي شاغللك

واللى حاطاه جوة قلبك

من زمان شايل همومك

قلبي ينزف من دموعك

وحضنى بيقدر يصونك

ده إنتِ قدرى



بحنانك راضى

بالحب يا الله ضمينا

بلاش تبعدى مراسينا

لا موج الغدر يرمىنا

ياخدنا يوم ما تلقينا

بالحب شيلي أوجاعنا

وخلى الفرحة تسمعنا

وشيلي من عيننا دموعنا

وهات إيدك وعدينا

حبيبتى لحنانك راضى

وقلوبنا ليك بتنادى

كفاية جرح وعنادى

بالبسمة تعالى وناديننا

يا مراكبى يا ماسك الدفة

بحبها عايز أدفا

وقلبك لو بعيد لسه

تقرب ليه خطاويننا



القانون

إسرائيل راسمة الحدود

من النيل إلى الفرات

لأجل ما تكمل مدينة

تحكم فيها كل العباد

والعرب نايمين في غفلة

نايمين في عمق الثبات

والفتن شغالة دوماً

وأى فتنة فيها نبات

مرة شيعى ومرة سنى

ومسيحي في بعض الأوقات

والجهل يحرك مدينة

وتخرج الأفكار رايات

وضعوا أفكار التخلف
نسجوا حتى الحكايات
إمتى نوصل للحقيقة
وإن في الوحدة ثبات
وأرض صلبة عليها نمشى
رسموا خطة وليها أوقات
والأتراك حاطين أيديهم
لاجل ما يهدوا الى فات
وبلاد العرب تولى
وهمّ هيعلوا الرايات
منها داعش فيها واغش
وياخدوا خير الى مات
وإسرائيل تحلم تزورنا
بتحلم بأرض جدودنا

من نيل بلدنا للفرات
إمتى يا بلاد العروبة
تفهموا وتنسوا الى فات
ترفعوا راية المحبة
والعمل يحيى الى مات
إزرعوا قوانين عدالة
حطوا فكر مستنير
ما يفرق أبيض وأسود
ولا أمير من غفير
لازم القانون يا عالم
لازم القانون يسير



جسور العشق

ما بين قلبي وبين قلبك

جسور عشاق

أعدى لك يطير قلبي

قوام مشتاق

بعشقه ويا تنهيدة

ولا لحظة يقول يا فراق

ولو فكر في يوم يبعد

أكيد ها تموته الأشواق

ما فيش ولا دمة في عيونك

ها سيبها لك

ولا كلمة تكون قاسية

ها قولها لك

ولا نظرة تكون جارحة

لجمالك

ولا مرة أسيب مرة

تدوقها حبيبي بلسانك

يا كاس ومليته حنية

وكل قطرة بعنيه

وأرضي البورها خضرها

وبأيديه

وأزرع فيها أحن قلوب

منديه

وأشغل م الحب ضلالية

تضلل كل صبحية



الشاعر في سطور

- ميخائيل رياض رزق
- من مواليد القاهرة (حلوان) 1 / 11 / 1963 م .
- بكالوريوس إدارة الأعمال (جامعة القاهرة) .
- تم نشر أعماله في جريدة الرأي وجريدة مصر بكرة ، وجريدة الشعر العربي .
- له العديد من التسجيلات الإذاعية والتلفزيونية .
- إذاعة القاهرة الكبرى (المقهى الثقافي) .
- إذاعة الصين الدولية (المقهى الثقافي) .
- برنامج دندنة (قناة الصحة والجمال) .

للتواصل مع الشاعر

mikhaelreyad@yahoo.com

الفهرس

2.....	بطاقة فهرسة
3.....	تقديم لديوان (جسور العشق)
4.....	إهداء
5.....	وسط الطيور
7.....	وحياة العيش
10.....	فى غمضة عين
13.....	ما تعيش شارد
15.....	أجمل وشوش
17.....	مد إيديك
20.....	طالب ودى
22.....	على القنال
25.....	مصر
27.....	جيش بلادى
29.....	عدى زمن السكات
33.....	مصر بتنده لنا
36.....	أنا طالع للقمر
38.....	خوفى عليك
41.....	بتحبنى
43.....	مصر الجميلة
45.....	أنا باكره الدموع
47.....	عودى
49.....	أنساك إزاي
51.....	فى ذكرى 6 أكتوبر

55.....	البلبل
56.....	أم الحنية مصر
58.....	كل الحياة
60.....	الذكريات
62.....	أطهر شباب
64.....	فى وقت ضعفى
66.....	ياست يا مصرية
68.....	الدنيا
71.....	نهضتك يا مصر
73.....	ضمينى يا بلدى
76.....	رديت روحى
78.....	الريس نادانا
80.....	المقدر والمكتوب
82.....	يا حنين
83.....	أمى
85.....	الأم مدرسة
87.....	الحجر الداير
88.....	عايزة تقولى إيه
91.....	ما نسيتش أنا
94.....	كلمة سلام
98.....	مصر الكريمة
100.....	بديناها بإيد مصرية
102.....	بالإيدين الشقيانين
104.....	الحلم جاى
105.....	لسه فاكّر
107.....	غيرى ملامحك

114.....	الظلم
117.....	وحشاني يا نوبة
120.....	إنت تقدر
123.....	لما أفكر
125.....	بتقول ظروف
127.....	التأمين الصحي
129.....	ماريا الجميلة
132.....	مايكل
133.....	يا حلم عمرى
135.....	بحنانك راضى
137.....	القانون
140.....	جسور العشق
142.....	الشاعر في سطور
143.....	الفهرس